

Siunnersuummut nassuiaatit

Siunnersuummut nassuiaatit nalinginnaasut**1. Aallaqqaasiut***1.1 Pingaarnerusutut tunuliaqutaasut*

Siunnersuummi tunuliaqutarineqarpoq ataqqinaammik tunniunneqartartunik agguaassinissamut inatsisitigut tunngavissiinissamik kissaateqarneq. Tassani naliliisoqarpoq tamanna eqqumiitsuliornermik suliaqartunut (eqqumiitsuliornermik inatsimmik) Inatsisartut inatsisaatigut tunngavissiisoqartariaqartoq.

Ataqqinaammik tunniuttakkanik tunniussisinnaaneq pillugu apeqqu UKA 2019/156-mi oqallisigineqarpoq: Uunga siunnersuut: Eqqumiitsuliornermik ingerlataqartut tamakkuninngalu siammarterisut pillugit Inatsisartut inatsisaannut allannguutissatut siunnersuut. (Eqqumiitsuliornermik ingerlatsineq tamakkuninngalu siammarterinermut aningaasaateqarfimmik tapiissutinik aqutsisussamik pilersitsinissamut inatsisitigut tunngavissat).

UKA 2019/156-ip siullermeerneranut atatillugu allannguutikkut ataqqinaammik tunniunneqartartut tunniuttalernissaannut periarfissaalernersoq pillugu apeqqutigineqarpoq. Kultureqarnermut, Ilinniartitaanermut Ilageeqarnermullu Ataatsimiititaliami suliarineqarneranut atatillugu siunnersuutip aappassaaneernejarnissaanut atatillugu isumaliutissiissummut ataatsimiititaliaq ima oqaaseqaateqarpoq:

"Ataatsimiititaliap isumaliutissiissummini Naalakkersuisunut nalileqquaa tunniussaq taamaattoq Nunatta Karsiata ukiuni arlalinni pisussaaffissaa qanoq inatsisitigut tunngavissamik piunasaqarfiussanersoq. Ataatsimiititaliap tamanna nangillugu oqaatigivaa tapiissutinut taamaattunut Nunatta Karsianik ukiuni arlalinni pisussaaffiliisussanut ersarissumik tunngavileqalernissaa qulakkeertariaqartoq. Taamaaliortariaqarporlu ukiuni arlalinnut atugassanik aningaasanik taamaattunik tunniussaqartarnermut piunasaqaatissat tunngavissallu pillugit malittarisassanik aalajangersaasoqarnissaa periarfissinniarlugu - soorlu nalunaarutitigut.."

Naalakkersuisut siunnersuutip aappassaaneernejarneranut akissummini ima nassuiaateqarput:

"Naalakkersuisut aamma nalilersugassaraat tapiissuteqartoqarsinnaaneranut tunngavissamik ersarissumik pilersitsisoqartariaqarnermoq, ukiup aningaasanut inatsimmi aningaasaliissutit saniatigut atuuttussamik, tassalu matumani ukiuni arlalinni aalajangersagaanngitsuni.

Tassungalu atatillugu oqaatigineqassaaq siunnersuummut matumani pineqartumut atatillugu naammassineqarsinnaanngitsutut tamanna nalilernerqarmat.

Taamaattumik taamatut inatsisissamik suliaqarnek inatsisissatut siunnersuummik suliaqarnermut nalinginnaasumik peruserineqartoq atorlugu ineriartortariaqarpoq, soorlu peqataasut attuumassutillit isumasiorlugit, tusarniaatitsinerit ingerlallugit Inatsisartunullu saqqummiussilluni. Taamaammat Naalackersuisut eqqumiitsuliornermik ingerlatallit suleqatigiiffii peqatigalugit inuuneq naallugu pisartagassanik kissaateqarnek aamma taamatut kissaateqarnerup piviusunngortissinnaanissaanut periarfissat pillugit kissaateqarnek pillugu oqallittoqarnissaanik pilersaaruteqarput. Tassungalu atatillugu piunasaqaatit qanoq ittut taamatut tunniussisoqarnissaani aalajangiisuussanersut, tunineqartartut amerlassusissaat, tunniunneqartut annertussusissaat, pisariaqassappat isertitanut naleqqussaasoqarnissaa aamma eqqumiitsulioriaatsinut ataasiakkaanut qanoq agguasaasoqartarnissaa erseqqissumik paasiniartariaqassapput, matumanilu aamma eqqumiitsuliorlut toqussartik tikillugu taamatut tunineqartartut aapparisaannut qimagaasunut aningaasanik kingusinnerusukkut tunniussisoqartassanersoq paasinaaffigalugu. Tamatuma saniatigut qulakkeertariaqarpoq taamatut tunniussisarnermut aningaasat pisariaqartinneqartut piginissaat, tassami uani malugisariaqarpoq tamanna aallaaviatigut killiliussat iluanni aningaasalersortariaqassammat, tamatumalu kingunerissallugu eqqumiitsulianik suliaqarnermut, sulinissamut legatinik allanillu agguaanissamut aningaasat ikinnerusut atortariaqalernissaat. Aamma eqqumiitsuliornermik ingerlatallit pillugit inatsisip kisimiitillugu iluarsiiiffiginissaa tulluartsuussanersoq, imaluunniit tamanna pillugu nalunaarutiliorluni malittarisassanik erseqqinnerusunik aalajangersaasoqassanersoq isummerfigineqartussaassaaq, ataatsimiititaliap ilanngullugu periarfissatut tikkuussinerattuut..”

Ataqqinaammik tunniunneqartartunik tunniussisarsinnaanermut periarfissaq pillugu Inatsisartuni ilaasortamit § 37 naapertorlugu apeqqutit marluk (nr. 1 aamma nr. 125) Naalackersuisut 2020-mi akissuteqarfigaat. Apeqqutini taakkunani marlunni ataqqinaammik tunniunneqartartut pillugit suliaqarnermut kiisalu inuuneq naallugu ataqqinninersiutinut sinaakkusiussat suut atuutissanersut, matumanilu inuuneq naallugu atuutissanersut imaluunniit ukiuni tallimani quliniluunniit atuutissanersut pillugit Naalackersuisut nassuiaaqqullugit qinnuigineqarput. Apeqqutinut taakkununga marlunnut Naalackersuisut akissutigaaq ataqqinaammik tunniunneqartartut atuutilissappata eqqumiitsuliorneq pillugu inatsimmik allannguisoqartariaqassasoq, kiisalu taamatut inatsisiliornermik politikikkut suliniutigineqalerpat ataqqinaammik tunniuttakkat pillugit sinaakkutissat sukumiinerusut, matumanilu tunniussisarnerit sivilissusutaat, pillugit eqqumiitsuliornermik suliallit oqaloqatigalugit pissasut.

Naalackersuisut aamma kissaatiginartutut isigalugu eqqumiitsuliorlut akissarsisitsinerlut tapiissutinut tunngavissamik ikkussisoqarnissaa.

1.2 Inatsimmik piareersaanermi pingaarnert

Naalackersuisut Eqqumiitsuliornikkut Pilersitsisut Ingerlatsisullu (EPI) siulersuisui peqatigalugit akissarsisitsinerit ataqqinaammik tunniuttakkat pillugit malittarisassiornissaq pillugu oqaloqatigaat. EPI-p eqqumiitsuliortunik akissarsisitsinissamut aamma ataqqinaammik tunniunneqartartunut inatsisitigut tunngavissiisoqassasoq kissaatigalugu oqaatigaa periaaserlu isumaqatigalugu, inatsisitigullu tunngavik sinaakkusiussallu pingaarnert eqqumiitsuliorneq pillugu inatsimmi aalajangersarneqassasut kiisalu sinaakkusiussat taakku nalunaarusiakkut sukumiinerusumik malittarisassiunneqassasut.

EPI-mit kissaatigineqarpoq eqqumiitsuliortut eqqumiitsuliornermik inuussutissarsiuteqarnermikkut angusaqarluarsimasut ataqqinaammik tunniunneqartartut eqqumiitsuliortut ataqqineqarniartarnissaat. Aalajangiisuusimannigilarli tunniuttakkat inuunerup sinneranut atuutinneqarnissaat. EPI tassunga atatillugu aamma siunnersuuteqarpoq ataqqinaatissiisummik tunniuttakkat pillugit aalajangiisartussanut tunngasunik inissiisoqarnissaanut, assersuutigalugu EPI-mit inassuteqaateqareernikkut imaluunniit EPI-p Eqqumiitsuliornermullu Aningaasaateqarfimmit suleqatigiinnikkut.

EPI-mit oqaatigineqarpoq imminnut pingaartuusoq ataqqinaammik tunniunneqartartut aningaasalersornerat maannakkut kontumit pingaarnert 40.95.01-mit tiguneqassanngitsut, taanna ilaatigut sulinissamut aningaasaliissutinut il.il. Eqqumiitsuliornermut Aningaasaateqarfimmit atorneqartarmat. Tassa imaappoq Aningaasanut Inatsimmit immikkut tassunga aningaasaliisoqassappat ataqqinaammik tunniuttakkat EPI-mit taamaallaat kissaatigineqarmata, tassa kontumi pingaarnert 40.95.01-mit ilaatigut eqqumiitsuliornermut suliniutinut sulinissamullu aningaasaliissutinut immikkoortinneqareersimasut pilliutiginaqit.

Akissarsisitsinissamut tunngavimmik ikkussineq kulturikkut nersornaasiinerit kajumissaatinullu sinaakkusiussat nutarterneqarnissaat pillugit isumaliutit tunngavigalugit pilersinneqarsimavoq. Isumaliutit EPI-mik ataatsimeeqateqarneq tunuliaqutaralugu pilersinneqarput. Maannakkut piffissami ukiut tamaasa ulloq 21. junimi aaqqissuussisoqartarpoq, eqqumiitsuliornermi nersornaat aammalu kajumissaataasinnaasoq inunnut kulturikkut maluginiarneqarsimasunut tunniunneqartarlutik. Aaqqissuussinermik taassuminnga nalilersuinermut atatillugu taamatut aaqqissuussinerup inuiaqatigiinni nalinginnaasumik eqqumiitsuliornerup kulturillu nersorniarnerinut atorneqarsinnaaneranut naleqqiullugu isumaliutiginnittoqarpoq taamaalillunilu aamma TV-kkut aallakaatitsinermut atatillugu innuttaasut tamarmik anguneqarsinnaallutik.

1.3. Siunnersuutip imarisai ataatsimut isigalugit.

Naalackersuisut ataqqinaammik tunniunneqartartunik tunniussisarnissaanut tunngavimmik siunnersuut imaqarpoq. Siunnersuut ataqqinaammik tunniunneqartartunut sinaakkutissanik imaqarpoq, tassunga ilanngullugit kina ataqqinaammik tunniuttakkanik tunineqarnissaanut killiliineq, tunniussinerit amerlassusii tunniussinerillu sivilissusai. Tamatuma nanginnerani

siunnersuummiippoq piumasaqaatinik aalajangersaanikkut ataqqinaammik tunniunneqartartut pillugit erseqqinnerusunik Naalakkersuisut malittarisassaliornissaannut pisussaaffik, aamma eqqumiitsuliornermi inatsimmi eqqaaneqartut eqqumiitsuliorfiit akornanni agguaassineq.

Siunnersuummi aamma aalajangersarneqarpoq Inatsisartut inatsisaanni ukiumut aningaasat tunngaviusut aalajangersarneqartuni ataqqinaammik tunniunneqartartunik pisarsinnaasoq, procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit procentimik aaqqiissutissamik ukiumoortumik iluarsineqartartoq. Aammattaaq aalajangersarneqarpoq ataqqinaammik tunniunneqartartut isertitat naapertorlugit iluarsineqartassasut, tamannalu pillugu aalajangersakkanik erseqqinnerusunik Naalakkersuisut aalajangersaassasut.

Siunnersuut aamma tamatuma saniatigut eqqumiitsuliorturnut akissarsisitsinikkut Aningaasanut inatsimmi aalajangersarneqartut aningaasat sinaakkusiussat iluanni Naalakkersuisut tapiissuteqarsinnaasut. Taamaalilluni siunertaavoq tamanna tunngavigalugu ukiut tamaasa eqqumiitsuliorturnut ataatsimut arlalinnulluunniit eqqumiitsuliorturnut ataatsimik arlalinnilluunniit Naalakkersuisut nersornaasiisinnaapput.

Siunnersuutip aamma taakku saniatigut imarai akissarsisitsinermik erseqqinnerusunik malittarisassaliornissamut Naalakkersuisut periarfissaat, matumanilu piumasaqaatinik, amerlassusaannik aalajangersaaneq kiisalu eqqumiitsuliorneq pillugu inatsimmi eqqumiitsulianik suliaasaqarfiit eqqaaneqartut akornanni agguaassineq.

2. Siunnersuummi immikkoortut pingaarnerit

2.1 Inatsisit atuuttut

Inatsisit atuuttut tassaapput Eqqumiitsuliornermik ingerlatsineq pillugu Inatsisartut inatsisaat nr. 11 6. juni 2016-imeersoq, Inatsisartut inatsisaatigut nr. 25 ulloq 28. november 2019-imeersutigut allangortinneqartoq (eqqumiitsuliornermut inatsit).

Naalakkersuisut eqqumiitsuliornermut inatsimmi § 3, imm. 1 naapertorlugu eqqumiitsuliornermik ingerlatsineq tamatuminngalu ingerlatsinermut suliaqartunut aningaasanik tapiisussaapput.

§ 8-mi aalajangersagaqarpoq Naalakkersuisut kommunalbestyrelsillu sunut aningaasatigut tapiisinnaanerannut tunngasumik. Tassani makku aalajangersarneqarput:

”§ 8. Naalakkersuisut aamma kommunalbestyrelsi makkununga tapiisinnaapput:

- 1) eqqumiitsuliornermik ingerlatsinerup ingerlanneranut, tamatumunnga ilanngullugit angalanernut aningaasartuutit matussusernissaannut aamma ineqarnermut aningaasartuutitut,*
- 2) eqqumiitsuliorluni suliat inerisarnerinut suliarinerinullu, tamatumunnga ilanngullugit eqqumiitsuliornermik ingerlatsinermut atortussat aamma*
- 3) eqqumiitsuliornermik ingerlatat saqqumersinnissaannut siammaannissaannullu.*

Imm. 2. Imm. 1 naapertorlugu tapiissutit, tapiissutit tigunissaannut piomasagaatit piviusunngortinneqarpata tapiissutit aningaasaliissutinik qularnaveeqqusiinertut tunniunneqarsinnaapput.

Imm. 3. Naalackersuisut eqqumiitsuliornermik ingerlatsinermut saqqummiinermullu tapiinissamut malittarisassanik aalajangersaassapput, tamatumunnga ilanngullugit tapiiffigineqarsinnaasut killilersornerat, tulleriarinissamut piomasagaatit, tapiissutit suussusii annertussusiilu, tapiinissamut piomasagaatit, tapiinermi atugassarititat, qinnuteqaatinut piomasagaatit, periusissat, allaffissornikkut aqutsineq aamma naammagittaalliorneq.”

Naalackersuisut § 8, imm. 3 tungavigalugu eqqumiitsuliornermik ingerlatsineq tamatuminngalu ingerlatsinermut tunngasunik sukumiisumik malittarisassiorsimapput. Tamanna pivooq Eqqumiitsuliornermik ingerlatsineq tamatuminngalu ingerlatitseqqittarneq pillugit Namminersorlutik Oqartussat nalunaarutaat nr. 75 21. december 2021-meersoq aqutugalugu. Tassani allaqqavoq tapiissutit tunniunneqarsinnaasut suliniutinut tapiissutit, sulinissamut tapiinertut, tapiissuteqarnissamut qularnaveeqqusiinertut, utertitsinertut kiisalu ingerlatsinermut tapiinertut.

Aamma §§-ini 9-11-mi Eqqumiitsuliornermik ingerlatsineq pillugu inatsimmi kalaallit eqqumiitsuliaannik, inniminniinikkut sulianut takutitsinermullu aningaasarsianut tunngasunik malittarisassanik aalajangersaasoqarpoq.

Inatsisini atuuttuni ataqqinaammik tunniunneqartartut pillugit malittarisassanik aalajangersaasoqarsimangilaq. Aamma ataqqinaammik tunniunneqartartunik tunniussinissamut Aningaasanut inatsimmi aningaasanik immikkoortitsisoqarsimanani.

Inatsisini atuuttuni aamma eqqumiitsuliornermik akissarsisitsineq pillugu malittarisassanik aalajangersaasoqarsimangilaq. Maannakkut piffissami kulturikkut nersornaasiisoqartarlunilu kajumissaammik tunniussisoqartarpoq. Nersornaasiinerit inatsisitigut malittarisassaqqartinneqanngillat kisianni Naalackersuisunit suliarineqasimasuni ileqqoreqqusani aamma Naalackersuisut.gl-imi tamanut saqqummiunneqarsimasuni, aamma Aningaasanut inatsimmi nersornaasiinernut aningaasanik immikkoortitsisoqarsimalluni. Nersornaasiinerit kultureqarnerup iluani inummut ataatsimut arlalinnulluunniit ukiut tamaasa tunniunneqartarput.

2.2 Siunnersuummik suliaqarnermut atatillugu isumaliusersuutit

Naalackersuisut siunnersuummik suliaqarnerminnut atatillugu isumaliunersuutigisimavaat eqqumiitsuliorneq pillugu inatsimmi allaffissornermilu malittarisassat naapertorlugit inatsimmik tunngaveqartumik ataqqinaammik tunniunneqartartut akissarsisitsisarnerillu qanoq annertutigisumik malittarisassiortoqassanersut.

Danmarkimi ataqqinaammik tunniunneqartartut pillugit malittarisassat Naalagaaffiup Eqqumiitsuliornermut aningaasaateqarfiup sulinera pillugu Inatsimmi nr. 458, 8. maj 2013-imeersumi aalajangersarneqarput. Danmarkimi malittarisassaliussanut ilisarnaataavoq sinaakktissat pingaarnertit inatsisitigut taamaallaat aalajangersarneqartarmata, erseqqinnerusumillu malittarisassaliussat nalunaarusiornikkut suliarineqartarlutik. Tamanna Naalagaaffiup Eqqumiitsuliornermut Aningaasaateqarfia pillugu nalunaarutikkut nr. 469 26. april 2019-imeersutigut pivoq.

Ataqqinaammik tunniunneqartartut siunnersuummi annertuutigut inatsisitigut malittarisassaqaartinneqarput. Tamanna arlalinnik tunngaveqartumik naleqquttutut nalilerneqarpoq. Ataqqinaammik tunniunneqartartut inatsisit tunngavigalugit aningaasaliinerusussat siunnersuutigineqarmata tamatuma namminermi piumasaraa tunniussinerup pinissaanut naammattumik tunngaveqarnissaanut inatsisitigut sinaakktissanik aalajangersaasoqarsimassasoq. Tassunga ilanngutissaaq tapiissuteqartarnissaq nutaaq siunnersuut pineqarmat, taamaattumik tulluassalluni pissutsinut pingaaruteqartunut inatsisiliortut isummernissaat, assersuutigalugu tunniussinerit amerlassusii, tunniussinerit sivilissusii annertussusaalu.

Naalakkersuisut akissarsisitsinerit eqqarsaatigalugit akerliatigut tulluartutut isigaat siunnersuummi pingaarnertigut sinaakktissanik taamaallaat aalajangersaasoqassasoq, taamaalilluni tunniussinernut malittarisassanik erseqqinnerusunik nalunaarutikkut aalajangersaasoqarluni. Taamatut aaqqissuussineq aamma Naalakkersuisut eqqumiitsuliornermik ingerlatsineq tamatuminnгалu ingerlatitseqqittarnermi tapiissuteqartarnermut atortareerpaat. Tamanna siunertamut tulluartutut isumaqarfigineqarpoq, tassa inuiaqatigiit uninngaannartuunnginnamik eqqumiitsuliorneq eqqumiitsuliornerullu silarsuaa sukkasuumik ineriartortuulluni. Akissarsisitsinikkut eqqumiitsuliornermik tapersersuisoqarnera ineriartorneq peqatigalugu nalunaarusiornikkut eqaallisarlugu allanngortinneqarsinnaavoq.

2.3 Siunnersuutip immikkoortui pingaarnertit

Siunnersuummi siunertarineqarpoq eqqumiitsuliornermik taakkulu eqqumiitsuliornermik suliaqarnerannik ataqqinninnissamut inatsisikkut tunngavissinikkut eqqumiitsuliornermik ineriartorneqat tapersersorneqassasoq. Tamanna pisinnaavoq ataqqinaammik tunniunneqartartutigit aamma eqqumiitsuliornermik nersornaasiinermi akissarsisitsinikkut eqqumiitsuliornermik Naalakkersuisut aningaasatigut tapiissuteqarnissaanut tunngavimmik pilersitsinikkut.

Siunnersuummi ataqqinaammik tunniunneqartartutigit akissarsisitsinikkullu tapiissuteqarnissamut Naalakkersuisut piginnaatinneqarput. Tamatumani Namminersorlutik Oqartussat Kulturikkut nersornaasiuttagaannut Kultureqarnermut Naalakkersuisumit ukiut tamaasa tunniunneqartartumut periaatsimik ingerlatitseqqinneruvoq. Taamaattorli aamma periarfissaavoq Naalakkersuisut ataqqinaammik tunniunneqartartunik aqutsineq Eqqumiitsuliornermut aningaasaateqarfimmut qanittukut pilersinneqartumut isumagisassanngortillugu, tak. Eqqumiitsuliornermik ingerlatsineq

pillugu Inatsisartut inatsisaata allanngortinneqarnera pillugu Inatsisartut inatsisaat nr. 25, 28. november 2019-imeersumi § 16 a-mi allanneqartumi. Periarfissat pingajuat tassaasinnaavoq ataqqinaatissiisummik tunniuttakkanik Kultureqarnermut Naalakkersuisumit Eqqumiitsuliornermut Aningaasaateqarfimmit innersuussereernikkut tunniunneqarsinnaanissai. Pingaarutaali tassaavoq tunniuttakkat taakku qinnuteqarnikkut tunniunneqartassanngimmata, soorlu eqqumiitsuliorneq pillugu inatsimmi § 8-mi tapiissuteqartarnermut taamaattoq.

Ataqqinaammik tunniunneqartartut kiisalu akissarsisitsinerit Eqqumiitsuliornermik ingerlatsineq pillugu inatsimmi § 8 malillugu tapiissutinit allaanerupput, tassa tapiissutit aningaasartuutinit, suliniutinit sulinermulluunniit aalajangersimasunut tunniuttagaammata. Taamaammata naatsorsuutinit tunniussinissamut aamma malittarisassaqqarpoq, taamaaliornikkut eqqumiitsuliortup tapiissutit qinnutigineqartunut atorneqarsimanerat uppersarsinnaaniassammagu. Siunnersuut naatsorsuutinit tunniussinissamut tunngasunik malittarisassanik imaqanngilaq, tassa aningaasatigut tapiissutigineqartut suleriaatsimut suliniummulluunniit aalajangersimasumut tunngatitaanngimmata. Ataqqinaammik tunniunneqartartutigit akissarsisitsinikkullu tapiissutit sulianut eqqumiitsuliortup suliareriigaanik innuttaasunullu aamma inuiaqatigiinnut eqqumiitsuliaasa nalinginnaasumik pitsaasumik sunniuteqartarnerinut ataqqinaammik tunniunneqartarput.

Maannakkut akissarsisitsisarnerit siunnersuummilu akissarsisitsisarnerit ataqqinaammik tunniussinerit annertusinerinut assigiinngissutaasoq tassaavoq inuit pisinnaatitaasut kiisalu aningaasanik tapiissutissat sinaakkutissat. Naalakkersuisut Kulturikkut Nersornaasiuttagaannik inuit tunineqartussat pillugit Naalakkersuisut nersornaasisitsisarnerminnut maleruaqqusani ima aalajangerneqqarpoq: *”inummut ataatsimut arlalinnulluunniit, peqatigiiffinnut kattuffinnulluunniit eqqumiitsuliornikkut kulturilerinikkulluunniit immikkut suliniuteqarsimasunut tunniunneqartarpoq.”* Kajumissaatitut nersornaammut tunngasumi ima allaqqavoq: *”inuusuttumut piginnaasalimmu, oqallitsisinikkut nutaaliornikkulluunniit, imaluunniit allatigut eqqumiitsuliornikkut kulturilerinikkulluunniit malunnaateqalersimasumut tunniunneqartassaaq. Nersorniarneqqartoq piginnaasaminik nangitsinissamut ineriartortitsinissamullu tunniussinikkut kajumissaaserneqqartassaaq.”* Nersornaatit taamaalillutik eqqumiitsuliornermut kulturilerinermullu tunngaviummik suliaqartunut tunniunneqarsinnaapput. Akissarsisitsinerit ataqqinaammik tunniunneqartartullu taamaallaat eqqumiitsuliortunut tunniunneqartassapput. Taakku saniatigut ataqqinaammik tunniunneqartartut eqqumiitsuliortup eqqumiitsulianik suliaqarnera tunuliaqataralugu taamaallaat tunniunneqartassapput.

2.3.2 Ataqqinaammik tunniunneqartartut

Ataqqinaammik tunniunneqartartuni eqqumiitsuliortoq ataqqiniarneqqartarpoq piffissamilu sivisunerusumi aningaasatigut taperneqqartarluni eqqumiitsuliornikkut piginnaasaminik inerisaaqqinniarnernani atorneqarsinnaasunik. Aamma ataqqinaammik tunniunneqartartut siunertaraa eqqumiitsuliortunik maligassiuisunik ukkatarinninnissaq, taamaalilluni eqqumiitsuliornerup aamma eqqumiitsuliortullu inuiaqatigiinnut pingaassusaat ukkatarineqarnerulernissaat anguneqassalluni. Siunnersuummi aalajangersarneqqarpoq ataqqinaammik tunniunneqartartut eqqumiitsuliortunut

eqqumiitsulianik ima suliaqartigisimasunut eqqumiitsuliortut akornanni aalajangiisuusutut inissisimasunut tunniuttassasut. Taamaalilluni paasineqassaaq ataqqinaammik tunniunneqartartut piginnaasalinnik nutaanik ataqqinninnermut tunngasuunngitsoq, kisianni ukiorpassuarni eqqumiitsuliortutut ingerlataqarsimanermi pingaaruteqartutut malunniuteqarsimasunut eqqumiitsuliortunut.

§ 1, nr. 1-imi siunnersuutigineqarpoq eqqumiitsuliorneq pillugu inatsimmi § 8-ip kingorna § 8 a-tut ikkunneqassasooq, tassani ataqqinaammik tunniunneqartartut pineqarlutik. § 8-imi tapiissutit sammineqarput, taamaammat siunertamut naapertuutereerpoq aalajangersagaq nutaaq tassannga uiggiunneqarpat.

§ 8a sisamanik immikkoortoqarpoq. Immikkoortuni 1-3-mi ataqqinaammik tunniunneqartartut pillugit atortussatigut pingaarnernik malittarisassiuunneqarput. Imm. 4-mi Naalakkersuisut peqquneqarput ataqqinaammik tunniunneqartartut pillugit erseqqinnerusumik aalajangersaassasut.

Imm. 1-imi ataqqinaammik tunniunneqartartut eqqumiitsuliortunut eqqumiitsulianik ima suliaqartigisimasunut eqqumiitsuliortut akornanni aalajangiisuusutut inissisimasunut tunniussisarnissamut Naalakkersuisunut tunngavissiisoqarpoq.

Oqaasertaliussami "ataqqinaammik tunniunneqartartut" paasinarsisinneqarpoq tunniussineq ataqqinninnerusooq, taamaalillunilu nersornaatitut ittoq pineqarluni. Tunniussinerit qinnuteqarnikkut tunniunneqarneq ajorput. Ataqqinaammik tunniunneqartartut § 8 naapertorlugu tapiissutinit allaanerupput, tassa tapiissutit aningaasartuutitut, suliniutitut sulinermulluunniit aalajangersimasunut tunniuttagaammata. Taamaammat naatsorsuutininik tunniussinissamut aamma malittarisassaqarpoq, taamaaliornikkut eqqumiitsuliortup tapiissutit qinnutigineqartunut atorqeersimanerat uppersarsinnaaniassammagu. Siunnersuut naatsorsuutininik tunniussinissamut tunngasunik malittarisassanik imaqanngilaq, tassa aningaasatigut tapiissutigineqartut suleriaatsimut suliniummulluunniit aalajangersimasumut tunngatitaanngimmata. Tapiissutit ataqqinaammik tunniunneqartut sulianut eqqumiitsuliortup suliareriigaanik innuttaasunullu aamma inuiaqatigiinnut eqqumiitsuliaasa nalinginnaasumik pitsaasumik sunniuteqartarnerinut ataqqinaammik tunniunneqartarput.

Eqqumiitsuliortut sorliit ataqqinaammik tunniunneqartartunik pisinnaasutut eqqarsaatigineqartussat killilernerini anguniarneqarpoq tassaassasut eqqumiitsuliortut eqqumiitsulianik suliaqarnerminni annertuumik ataqqineqalersimasut.

Imm. 2-mi aalajangersarneqarpoq ataqqinaammik tunniunneqartartut eqqumiitsuliornermi pilersitsiortukkat pitsaassusaasa naliliiviginerisigut taamaallaat tunniunneqarsinnaasut.

Eqqumiitsuliornermik inatsimmi § 13-imi eqqumiitsuliornermik suliaqarnermut tapiissuteqartarnek pillugu aalajangersagaqarpoq. Imm. 1-imi aalajangersagaqarpoq Naalakkersuisut aamma kommunalbestyrelsi eqqumiitsuliornikkut pitsaassutsip piginnaaneqassutsillu nalilernerqarnerat tunngavigalugu eqqumiitsuliornermik ingerlatsinerneqarnerat tapiissassat. Siunertamut naapertuuttut isigineqarpoq ataqqinaatissiisummik tunniuttakkanut tunngatillugu ersarissarneqassasoq tunniuttakkat eqqumiitsulianik suliat pitsaassusaat pillugit nalilersuinikkut pisassappata. Taamaalilluni ataqqinaammik tunniunneqartartunik pissarsinissamut eqqumiitsuliortup piginnaasa kisimik naammangillat. Eqqumiitsuliortup ingerlataqarnerani eqqumiitsuliaasa pitsaassusaannik ataqqinninnertut tunniussisoqartassaaq.

Imm. 3-mi aalajangersarneqarpoq ataqqinaammik tunniunneqartartut sisamaassasut, piffissamut ukiunut qulinut tunniunneqartut, taavalu ataqqinaammik tunniuttakkat inuttaaruppata taanna kingumut piffissamut ukiunut qulinut tunniunneqarsinnaasoq.

Ataqqinaammik tunniunneqartartut piffissami ukiunut qulinut tunniunneqartartussatut aalajangersarneqarnerisigut siunertarinearpoq eqqumiitsuliortup piffissami pineqartumi aningaasaqarnikkut qularnaveeqquserneqarnissaa, taamaalilluni suli eqqumiitsuliornerneqarnerisigut aningaasaqarnikkut periarfissaqarluni. Tunniuttakkat aamma ataasiaannartumik tunniunneqartartunik nersorinnissutinit allaannerummata.

Imm. 4-mi aalajangersarneqarpoq ataqqinaammik tunniunneqartartut pillugit aalajangersakkanik erseqqinnerusunik Naalakkersuisut aalajangersaasinnaasut, tassunga ilanngullugit piimasaqaatit aamma § 1, imm. 1-imi eqqumiitsuliorfiit eqqaaneqartut akornanni agguaassineq. Erseqqinnerusunik aalajangersakkanik aalajangersaneq nalunaarutikkut pissaaq, Taamaaliornermi eqqumiitsuliortut kattuffii peqataatinneqarnerisigut pinissaat naatsorsuutigineqarpoq.

§ 1, imm. 1-imi siunnersuutigineqarpoq, eqqumiitsuliorneq pillugu inatsimmi ataqqinaammik tunniunneqartartut annertussusaannut tunngasumik § 8a-mik nutaamik aalajangersakkamik ikkussisoqassasoq. Imm. 1-imit takuneqarsinnaavoq ataqqinaammik tunniunneqartartut ukiumut ataatsimut aningaasat tunngaviusut 250.000 kr.-iusut. Imm. 2-mi aalajangersarneqarpoq aningaasat tunngaviusut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit procentimik aaqqiissutissamik ataatsimik ukiuni aningaasanut inatsiseqarfiusunut tamanut iluarsineqartassasut. Imm. 3-mi aalajangerneqarpoq ataqqinaammik tunniunneqartartut isertitat naapertorlugit tunniunneqartassasut. Imm. 4-mi aalajangersarneqarpoq ataqqinaammik tunniunneqartartut isertitat naapertorlugit iluarsisarneq pillugu aalajangersakkanik erseqqinnerusunik Naalakkersuisut aalajangersaassasut.

Ukiumoortumik iluarsisarnerup siunertaraa aningaasat tunngaviusut naliisa akitigut isertitatigullu ineriartornermit kimeerukkiartortinnginnissaat. Isertitat naapertorlugit iluarsisarnerup siunertaraa pisartagaqartup isertitaqarnera ima annertutigippat aningaasat tunngaviusut tamakkiisumik

aningsartaasa ingerlatiinnarnissaat naammaginarunnaarpat aningaasat tunngaviusut ikilineqarsinnaallutik. Tamatuminnga erseqqinnerusumik malittarisassiuussineq nalunaarusiornikkut pissaaq.

2.3.2 Akissarsisitsineq

Siunnersuummi siunertarineqarpoq eqqumiitsuliortut suliaqarnerat taakkulu eqqumiitsuliornikkut piginnaasaqarnerat akissarsiaqartinnissaanut tunngavimmik pilersitsinikut eqqumiitsuliortut ineriartornerat tapersorneqassasoq. Akissarsisitsinikkut eqqumiitsuliortoq ataqqiniarneqarpoq peqatigisaanillu eqqumiitsuliornikkut piginnaasaminik inerisaaqqinniarnerni aningaasatigut iliuuseqarsinnaalluni. Aamma akissarsisitsinerup siunertaraa eqqumiitsuliortunik maligassiuusunik ukkatarinninnissaq, taamaalillunilu eqqumiitsuliornerup aamma eqqumiitsuliortullu inuiaqatigiinnut pingaassusaat isiginiarneqalerluni.

Siunnersuummut taamaattumik 8c-mi ilaavoq Aningaasanut Inatsimmi aningaasatut sinaakkusiussat iluanni Naalackersuisut eqqumiitsuliortunik akissarsisitsinissamat tapiissuteqarnissaat. Tamatuma nanginnerani aalajangersarneqarpoq eqqumiitsuliortunik akissarsisitsineq pillugu aalajangersakkanik erseqqinnerusunik Naalackersuisut aalajangersaasinnaasut, tassunga ilanngullugit piumasaaqatit, amerlassusai aamma § 1, imm. 1-imi eqqumiitsuliorfiit eqqaaneqartut akornanni agguaassineq.

2.3.3 Atuutilersitsineq

§ 2-mi aalajangersarneqarpoq Inatsisartut inatsisaat 1. januar 2023-mi atuutilissasoq. Piffissap atuutilerfissaa siunnersuutigineqarpoq ataqqinaatissiisummik tunniuttakkat siunnersuutip akuerineqarniarnerniit piaartumik atuutilernissaa isiginiarlugu.

3. Pisortanut aningaasaqarnikkut allaffissornikkullu sunniutissat

Siunnersuut aningaasaqarnikkut kinguneqartitsissaaq, tassa siunnersuummi siunertaamat inatsimmi tunngavissaqarnissamat tapiissutit tunniunneqartareersut qaavatigut eqqumiitsuliortunut aningaasaqarnikkut Naalackersuisut tapiissuteqartarnissaat eqqunneqassasoq. Aningaasaqarnikkut kingunissai Nunatta Karsianut aningaasartuutit qaffannerinik kinguneqassaaq. Nersornaatinik ataqqinaammik tunniunneqartartunik aqutsinermut naleqqiullugu naliliisoqanngilaq annikitsuaqqatigut killiliussat saniatigut tamanna allaffissornikkut aningaasaqarnikkullu kinguneqassasoq.

3.1 Ataqqinaammik tunniunneqartartut

Siunnersuummi aalajangerneqarpoq 250.000 kr.-inik ataqqinaammik tunniunneqartartut aningaasatut tunngaviusutut eqqumiitsuliortunut sisamanut tunniunneqartassasut. Aallaaviatigut tamatuma kinguneraa ukiumut ataatsimut Nunatta Karsia 1 million kr.-inik aningaasartuuteqassasoq. Siunnersuummi aamma aalajangersagaqarmat tunniuttakkat isertitat naapertorlugit iluarsineqartassasut aningaasartuuterpianut apeqqutaassaaq eqqumiitsuliortup isertitai

tunngavigalugit isertitat iluarsineqartarnissaat pillugu malittarisassat. Isertitat naapertorlugit iluarsisarnermut naleqqiullugu isertitanik iluarsisarnissap piviusumik nalunaarutikkut qanoq pinissaa pillugu malittarisassanik erseqqinnerusunik aalajangersaanissamut Naalakkersuisut pisussaaffeqarput. Ukiumut aningaasartuutit taamaattumik pisartagaqartup isertitaqarneratigut allanngornerit naapertorlugit ukiumiit ukiumut aamma allanngorassapput. Ukiumut aningaasartuutiviit isertitat tunngavigalugit iluarsisarnerp malitsigisaanik 1 million koruuninit ikinnerunissaat naatsorsuutigineqassaaq, tassa ataqqinaammik tunniunneqartartunik pissarsisartut ilai ima isertitaqassammata aningaasat tunngaviusut appartinnerinik kinguneqartussaani naatsorsuutigineqarluni.

3.1 Akissarsisitsineq

Naalakkersuisut siunnersuut naapertorlugit eqqumiitsuliortunik akissarsiaqartitsissapput, tassa imaappoq maannakkut kulturikkut nersornaasiisarnert kajumissaataasartullu saniatigut eqqumiitsuliortunut nersornaasiisoqartassasoq. Aningaasat annertussusaat Aningaasaqarnermut Inatsimmi aalajangerneqartunik sinaakkuserneqassapput. Nersornaatit sisamat pilersinneqarnissaat naatsorsuutigineqarpoq, ataasiakkaallu 20.000 kr.-inik akeqassallutik. Nersornaasiinernut ukiumut aningaasartuutit taamaattumik 80.000 kr.-iunissaat naatsorsuutigineqarpoq.

4. Inuusutissarsiutinik ingerlataqartunut aningaasatigut allaffissornikkullu sunniutissat
Inuusutissarsiutinik ingerlatalinnut sunniuteqartoqarnavianngitsoq nalilerneqarpoq.

5. Avatangiisinut, pinngortitamut inuillu peqqissuunissaannut sunniutissat
Siunnersuut avatangiisinut pinngortitamullu sunniuteqartussaanngitsoq nalilerneqarpoq.

6. Innuttaasunut kingunerisassat

Innuttaasunut toqqaannartumik tamanna tunngaviusumik kinguneqassanngilaq, siunnersuutilli siunertaraa inuiaqatigiinni eqqumiitsuliortut eqqumiitsuliallu ineriartortinneqarnissaannut tapersorsornissaat. Nunatsinni eqqumiitsuliornerp patajaallisarneqarnerata siammarterneqarneratalu innuttaasunut Nunattalu kulturianut iluaqutaassaaq.

7. Sunniutissat allat pingaarutillit

Siunnersuut allanik malunnaatilinnik sunniuteqarnavianngitsoq nalilerneqarpoq.

8. Oqartussaasut suleqatigiiffiillu il.il. tusarniaavigineqarnerat

Siunnersuut piffissami 27. maj 2022-imiit 24. juni 2022-p tungaanut Naalakkersuisut tusarniaanermut nittartagaatigut pissarsiarineqarsinnaasimavoq, tusarniaanermullu peqataasunut nassiuunneqarsimalluni, takuuk ilanngussaq 2.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

§ 8a-mut

Imm. 1-imut

Ataqqinaammik tunniunneqartartut eqqumiitsuliortunut nammineq pilersitsisartunut tunniunneqartassapput taakku eqqumiitsuliortut aalajangiisuusumik inissisimappata.

Eqqumiitsuliortuni nammineq pilersitsisartuni paasineqarput eqqumiitsuliortut eqqumiitsulianik asseqanngitsunik pilersitsisut. Oqaaseq "eqqumiitsuliaq" nalinginnaasumik qangatut qalipakkatut, filmitut, nuutitut il.il. paasinninnermit annertunerusumik paasineqassaaq. Eqqumiitsuliortut nammineq pilersitsisartut § 1, imm. 1-imi eqqaaneqartuni eqqumiitsuliorfinni tamani nassaassaapput.

Eqqumiitsulianik suliaqarneq eqqumiitsuliortunik ingerlatitseqqiisut ilaatinneqanngillat.

Eqqumiitsuliortoq ima suliaqartoq, pineqartoq eqqumiitsuliortut aalajangiisuusutut inissisimasoq nalilersorneqassaaq nalunaarusiornikkut sukumiinerusumik aalajangersakkanik piumasagaatinik nalilersuinikkut pissalluni. Piumasagaatit taakku eqqumiitsulianik suliaqarfiit ataasiakkaat naapertorlugit assigiinngissinnaapput.

Imm. 2-mut

Aalajangersakkami ataqqinaammik tunniunneqartartut eqqumiitsuliornermi pilersitsiortukkat pitsaassusaasa naliliiviginerisigut taamaallaat tunniunneqarsinnaasut aalajangerneqarpoq. Pitsaassutsimik naliliineq taamaalilluni eqqumiitsuliornermik suliaqartunit naliliineruvoq.

Imm. 3-mut

Aalajangersakkami aalajangersarneqarpoq ataqqinaammik tunniunneqartartut sisamat tunniunneqartassasut, piffissamut ukiunut qulinut tunniunneqartut, ataqqinaammik tunniuttakkat inuttaaruppata piffissamut ukiunut qulinut nutaanut tunniunneqassalluni.

Tassa imaappoq tunniunneqartartoq inuttaaruppat ataqqinaammik tunniunneqartartut nutaat taamaallaat tunniunneqarsinnaasut. Tamanna pisinnaavoq pisartagaqartup pisartakkani taamaatippagu, pisartagaqartoq toquppat imaluunniit piffissaliussa qulit naappata. Ataqqinaammik tunniunneqartartut inuttaaruppata pisartagaqarnissamut piumasagaatinik naamassinnittumut eqqumiitsuliortumut nutaamut piffissamut ukiunut qulinut ataqqinninersiutit pillugit nutaamik aalajangiisoqassaaq, tak. siunnersuummit § 8a, imm. 1-2 aamma imm. 4.

Imm. 4-mut

Aalajangersakkami Naalackersuisut suliakkerneqarput ataqqinaammik tunniunneqartartut pillugit sukumiinerusumik aalajangersaassasut tassani ilaatinneqassallutik taakku ilaatigut suut ilaatinneqassanersut.

Piomasaaqatit tassaatinneqarput pissutsit aalajangiisuusut eqqumiitsuliortup ataqqinaammik tunniunneqartartut tunineqarnissaannut tulluurtuunersoq pillugu.

Eqqumiitsuliornermik suliassaqrfiit ataasiakkaat ima paasineqassapput ataqqinaammik tunniunneqartartut eqqumiitsulianik suliassaqrfinnut ataasiakkaanut qanoq agguanneqassanersut.

§ 8b-mut

Imm. 1-imut

Aalajangersakkami tunniuttakkat annertussusaat aalajangersarneqarput, aamma tassaasut aningaasat tunngaviusut, tassa imaappoq eqqumiitsuliortup pissarsiarisinnaasai aningaasat annertunerpaaffiisut taaneqarsinnaasut.

Imm. 2-mut

Aalajangersakkami siunertaavoq procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit procentimik aaqqiissutissaq malillugu ataqqinaammik tunniunneqartartut ukiumut iluarsineqartartut.

Procenti aaqqiissutissaq aamma maannakkorpiaq aningaasarsiat pillugit Inatsisartut inatsisaata ikiorsiissutinut pisortanit tunniunneqartartuni nalinginnaasumik atorneqarnissaa siunertaavoq. Iluarsiiinermi pisortanit ikiorsiissutit pineqartunut ilaasut ingerlaavartumik akinut iluarsineqartarnissaat assigiissaarneqarnissaallu qulakkeerneqassaaq.

Iluarsiinermi ataqqinaammik tunniunneqartartut nalingisa ukiut ingerlanerini, akini aammalu inuiaqatigiinni isertitani nalinginnaasumik qaffaataasut malitsigisaannik, neriorneqarnissaa pitsaaliorneqassaaq.

Imm. 3-mut

Aalajangersakkami aalajangersarneqarpoq ataqqinaammik tunniunneqartartut isertitat apeqqutaatillugit iluarsineqartassasut. Isertitat apeqqutaatillugit iluarsiiinermi paasineqassaaq aningaasat ataqqinaammik tunniunneqartartut amerlassusissaat eqqumiitsuliortup isertitai apeqqutaatillugit.

Imm. 4-mut

Isertitat tunngavigalugit iluarsineq piviusumik ima piviusunngortinneqassasoq eqqarsaatigineqarpoq nalunaarutikkut aalajangersarneqarluni aningaasat tunngaviusut 250.000 kr.-it tassaasut aningaasat annerpaaffissaat, nalunaarummi malittarisassat erseqqinnerusumik aalajangersarneqartut naapertorlugit ikilisinneqarsinnaasut, ukiumi aalajangersimasumi pisartagaqartup isertitai apeqqutaatillugit. Aamma nalunaarutikkut ataqqinaammik tunniunneqartartut aningaasartaasa minnerpaaffissaasa annertussusaa aalajangersarneqarsinnaavoq. Aamma eqqarsaatigineqarsinnaavoq ataqqinaammik tunniunneqartartut annertussusaatigut aningaasat minnerpaaffilerneqassanngitsut.

Tamatuma saniatigut ataqqinaammik tunniunneqartartut naatsorsornerini isertitat suut tunngavigineqarnissaat pillugu malittarisassanik aalajangersaasoqarsinnaavoq.

§ 8c-mut.

Imm. 1-imut

Aalajangersakkami aalajangersarneqarpoq Aningaasanut Inatsimmi aningaasatut sinaakkutissatut aalajangersarneqartup iluani eqqumiitsuliortunut akissarsisitsinermut Naalakkersuisut tapiissuteqarsinnaasut. Akissarsisitsineq eqqarsaatigineqarpoq eqqumiitsuliornermi nersornaasiinikkut pisassasoq.

Eqqumiitsuliornermi nersornaasiinerit taakku eqqumiitsuliortunut nersornaatitut tunniunneqassapput. Eqqumiitsuliornermi nersornaat assersuutigalugu eqqumiitsuliortup suliaanik imaluunniit saqqummersitaanik nersornaatitut tunniunneqarsinnaavoq, eqqumiitsuliornikkut piginnaasaqarneranik nersornaatitut, ataqqinaatitut imaluunniit eqqumiitsuliornikkut sulinerani eqqumiitsuliortup nutaamik pullaveqarneranut.

Imm. 2-mut

Aalajangersakkami akissarsisitsineq pillugu erseqqinnerusumik aalajangersakkanik Naalakkersuisut aalajangersaanissaannut periarfissiivoq, tassani suut ilaatinneqassanersut allallugit.

Piumasaqaatit paasineqarput eqqumiitsuliortup eqqumiitsuliornermi nersornaatisinissaanut piukkunnaateqarneranut pissutsit aalajangiisuusut.

Amerlassusiini paasineqarpoq eqqumiitsuliornermi nersornaatit qassit tunniunneqassanersut.

Eqqumiitsuliorfiit akornanni agguaassinermi eqqarsaatigineqarput eqqumiitsuliorneq pillugu inatsimmi eqqumiitsuliorfiusut arfineq marluk akornanni eqqumiitsuliornermi nersornaatit assigiinngitsut qanoq agguarneqassanersut, tak. eqqumiitsuliornermi inatsimmi § 1, imm. 1.

§ 2-mut

Aalajangersakkami takutinneqarpoq Inatsisartut inatsisaata siunnersuutigineqartutut piffissaq atuutilerfissaa. 1. januar 2023. Tamatumani siunertaavoq allannguutissatut siunnersuutip akuersissutigineqarniarneranit piaartumik atuutlernissaa.

Siunnersuut inatsimmut atuuttumut sanilliullugu	
Oqaasertaliunneqartut atuuttut	Siunnersuut
	<p style="text-align: center;">§ 1</p> <p>Eqqumiitsuliornermik ingerlatsineq pillugu Inatsisartut inatsisaat nr. 11 6. juni 2016-imeersumi Eqqumiitsuliornermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. 25, 28. november 2019-imeersutigut allanngortinneqartoq, imaattunik allannguuteqarpoq:</p>
	<p>§ 8-p kingornanut ikkunneqassaaq:</p> <p>”§ 8a. Eqqumiitsuliornikkut ima eqqumiitsuliorsimallutik eqqumiitsuliortut pingaaruteqartut inississimasunut eqqumiitsuliortunut nammineq pilersitsisartunut ataqqinaammik tunniunneqartartunik Naalakkersuisut tunniussissapput.</p> <p><i>Imm. 2.</i> Ataqqinaammik tunniunneqartartut eqqumiitsuliornermi pilersitsiortukkat pitsaassusaasa naliliiviginerisigut taamaallaat tunniunneqarsinnaapput.</p> <p><i>Imm. 3.</i> Piffissamut ukiunut qulinut tunniunneqartunik ataqqinaammik tunniunneqartartut sisamat tunniunneqarsinnaapput. Ataqqinaammik tunniunneqartartut inuttaaruppata taakku piffissamut ukiunut qulinut nutaanut tunniunneqassapput.</p> <p><i>Imm. 4.</i> Ataqqinaammik tunniunneqartartut pillugit aalajangersakkanik erseqqinnerusunik Naalakkersuisut aalajangersaassapput, tassunga ilanngullugit § 1, imm. 1-imi piumasaqaatit aamma eqqumiitsuliorfiusutut eqqaaneqartut akornanni agguaassinerit.</p>

	<p>§ 8b. Ataqqinaammik tunniunneqartartunut aningaasat tunngaviusut ukiumut ataatsimut 250.000 kr.-iupput.</p> <p><i>Imm. 2.</i> Imm. 1-imi aningaasat tunngaviusut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni maleruagassat malillugit procentimik aaqqiissutissamik ukiunut aningaasanut inatsiseqarfiusunut tamanut iluarsineqartassapput.</p> <p><i>Imm. 3.</i> Ataqqinaammik tunniunneqartartut isertitat naapertorlugit tunniunneqartassapput.</p> <p><i>Imm. 4.</i> Ataqqinaammik tunniunneqartartut isertitat naapertorlugit tunniunneqartarneri pillugit aalajangersakkanik erseqqinnerusunik Naalakkersuisut aalajangersaassapput.</p> <p>§ 8c. Aningaasanut inatsimmi aalajangersarneqartut aningaasatut sinaakkusiussat iluanni eqqumiitsuliortunik akissarsisitsinermut Naalakkersuisut tapiissuteqarsinnaapput.</p> <p><i>Imm. 2.</i> Eqqumiitsuliortut akissarsisitsinerit, tassunga ilanngullugit piumasaqaatit, amerlassusai aamma eqqumiitsuliorfiit § 1, imm. 1-imi eqqaaneqartut akornanni agguaanerit pillugit aalajangersakkanik erseqqinnerusunik Naalakkersuisut aalajangersaasinnaapput.</p>
	<p style="text-align: center;">§ 2</p> <p>Inatsisartut inatsisaat ullormi 1. januar 2023 atuutilissaaq.</p>

Tusarniaanermut allakkiaq

Siunnersuut piffissami 2022-mi 27. majimiit 24. juni 2022-mut Naalakkersuisut tusarniaanermut nittartagaatigut tamanut saqqummiunneqarsimavoq tusarniaaffigisassanullu ukununga tusarniaassutigalugu nassiunneqarsimalluni:

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Nunatta Isiginnaartitsisarfia, SILA, Kalaallit Atuakkiortut Peqatigiiffiat, Nipilersortartut Peqatigiiffiat, KIMIK, Sulisitsisut, Nunatta Katersugaasivia Toqqorsivialu, KANUNUPE, Ilisimatusarfik, Det Grønlandske Landsbibliotek, NAPA, Katuaq, Taseralik, EPI, Grønlands Kunstfond, Kalaallit Nunaata Radioa, NTK, NUSUKA.

Tusarniaanermi akissutit pingasut tiguneqarput, taakkunanga uku oqaaseqaateqarsimanatik: Kommuneqarfik Sermersooq

Tusarniaaffigineqartut uku siunnersuummut oqaaseqaateqarput: Nunatta Isiginnaartitsisarfia aamma Sulisitsisut.

Tulliuttuni tusarniaanermi akissuteqaatit takkussuuttut suliarineqassapput tusarniaassutitut oqaaseqaateqarsimasunit. Tusarniaanermi akissutit oqaasertaat tamakkerlugit issuarneqarput kingornalu Naalakkersuisunit ukunanga akineqarlutik:

Nunatta Isiginnaartitsisarfianiit tusarniaanermut akissut:

"Siunnersuut pissutigalugu tamanna eqqumiitsuliornermut kulturimullu aningaasanik nutaanik pilersuissammat siunnersuut tamakkiisumik tapersorsorparput."

Nunatta Isiginnaartitsisarfianiit tusarniaanermut akissut:

Nunatta Isiginnaartitsisarfianiit siunnersuut ilalerneqarmat oqaatigineqassaaq.

Sulisitsisuniit tusarniaanermi akissut:

"Matumuuna Sulisitsisut (GE) qulaani allassimasumut allannguutissatut siunnersuummut oqaaseqaatini nassiuppaat.

GE isumaqarpoq siunnersuutip tunuaniittut pitsaalluinnartuusut eqqumiitsuliornikkullu piginnaasaqanngitsunut eqqarsartaatsikkut unammillertitsisunut eqqumiitsulianut tunngatillugu eqqumiitsuliortut inuiaqatigiinnit tapersorsorneqarnerat pillugu tamakkiisumik tapersersuisinnaallutik.

Siunnersuutip soorlu nammineq eqqaagaa aningaasaqarnikkut tunniussisarnikkullu sinaakkusiussat immikkoortillugit inatsisissatut siunnersuummi aalajangersarneqartussaapput. GE-p naliliinera malillugu siunnersuummi tassani kulturimut aningaasat qaffannerinut isummertoqartariaqassaaq. Tamanna amigaataammat siunnersuummut siunnersuut pillugu aningaasaqarnikkut sinaakkusiussat pigineqalertinnagit GE-p isumaa inaarutaanngilaq.

Tassunga oqaatigineqassaaq ataqqinaammik tunniuttakkanik pissarsinissamut piffissatigut pitsaassutsikkullu piumasaqaatinut pissutsinullu siunnersuummi isummersimaneq aamma amigaataavoq.

Aningaasat immikkoortinneqartussat suli akuerineqanngitsut piussutigalugit kultureqarnermut tunngasuni immikkoortinneqartunut aningaasanut allanut naleqqiullugu nangaanartoqarpoq. GE-p manna tikillugu siunnersuummut pitsaasumik isummerneranut taamaattumik apeqqutaavoq missingersuutini tamarmiusuni aningaasaqarnikkut siunnersuutip qanoq kinguneqarumaarnera. Siunnersuutip taassuma akuerineqarneratigut immikkoortuni allani annikilliliineq taamaassappat tunngavilersugaalluassaaq.

Tassunga atatillugu tusarniaanermi naalackersuisoqarfiup allakkiaani quppernemi 2/3-mi, immikkoortumut annertuumut kingulliup tullianut innersuussisoqarpoq, tassani takuneqarsinnaalluni siunnersuutip pisariaqartumik aningaasalersornissaa qulakkeerneqassasoq. "tassa oqaatigineqarmat (ataqqinaammik tunniunneqartartut, uanga ilanngussara) aallaaviatigut sinaakkusiussat pioreersut iluanni aningaasalersorneqarsinnaasut, taamaalillunilu tamatuma kingunerissallugu eqqumiitsuliornermi suliniutinut, sulinermit aningaasanut il.il. agguaanneqartussat aningaasat ikinnerulissallutik".

Tassunga atatillugu atorneqartumi "sinaakkusiussani pioreersuni" suunersut erseqqinngilaq. GE'p isumaa malillugu siunnersuutigineqartoq suliassaqaarfimmut aningaasaqarnikkut kinguneqartussaammat kultureqarnerup iluani aningaasaleeqqinnissaq siumoortumik politikerinit matuneqareersimavoq.

Kulturi arlalissuartigut sinaakkusiussat annikitsut iluanni suliaqarpoq, eqqumiitsuliortullu pineqartup isertitaqarnera pitsaanerulerpat ataqqinaammik tunniunneqartartuni iluarsisoqarnissaanut (aamma annikilliliissumik) siunnersuummi periarfissamik ammaassisoqartillugu siumoortumik "kaasarfimmit ataatsimiit tigusilluni allamut ikisinissamut" tunngavissaqanngilaq.

Eqqumiitsuliorneq iliuseqarfigineqarniarpat - siunnersuummilu matumani tamanna uppernarsarneqarluni Naalackersuisut taamaaliorniartut - taava kaasarfimmiit ataatsimiit tigusilluni allamut tunniussinissaq iluaqutaanaviannngilaq.

GE taamaattumik siunnersuummi siunniussamut isumaqataavoq, kisianni aningaasaqarnikkut, piviusut paasissutissat amigaataasorpasuit pissutigalugit siunnersuummut inaarutaasumik isumaqataanani.

Allakkiap matuma tiguneqarnera oqaatigeqquneqarpoq."

Sulisitsisut tusarniaanermi akissutaannut oqaaseqaatit: Siunnersuutip tunuliaqutai pillugit eqqarsaat pitsaasuusooq Sulisitsisut isumaqartut maluginiarneqarpoq.

Taakku saniatigut maluginiarneqarpoq tusarniaanermi akissutit annertunerpaartaa siunnersuutip aningaasaqarnikkut kingunissaata aningaasalersornissaanut tunngasuusooq, tassunga ilanngullugu aningaasanut inatsimmi kontumi pingaarnermi 40.95.01-imi immikkoortinneqarsimasut eqqumiitsuliornermut kulturimillu aningaasaareersut ilanngarnerisigut aningaasalersuisoqarnissaa ernumassutigalugu.

Siunnersuummi siunertaanngilaq siunnersuut nammineq sinaakkusiussat iluanni aningaasalersorneqassasoq, soorlu siunnersuummut nassuiaatini "sinaakkusiussat pioreersutut" eqqaaneqartut, GE-p tusarniaanermi akissutaani ersernerluttut uparuarneqartoq. Aningaasalersuineq nammineq sinaakkusiussat iluanni nassaarineqassappat tamanna isumaqarpoq aningaasalersuineq aningaasanut inatsimmi aningaasat immikkoortinneqareersimasut iluanni nassaarineqassasut. Siunnersuummi matumani tamanna siunertarineqanngilaq. Siunnersuummik uuminnga suliaqarnermi EPI allaffissornikkut suliaqartunit ataatsimeeqatigineqarpoq. GE-mit oqaatigineqartut EPI taamaaqataanik aningaasalersuineq pillugu ernumassuteqarsimavoq, tamanna siunnersuummi quppernerit aappaanni allaaserineqarpoq.

Taamaalilluni uani tikkuarneqassaaq tusarniaanermi allakkiami qupperneq 2/3-mi immikkoortoq Sulisitsisut tusarniaanermi akissummini innersuussinera tassaavoq ukioq 2019-imi ukiakkut ataatsimiinnermi immikkoortoq 156-imut ulloq 8. november 2019-imi Naalakkersuisut akissuteqaataanniit issuaaneruvoq. Naalakkersuisoqarfiup issuaaneq tusarniaanermi allakkiamut ilanngussimavaa, tassa ukioq 2019-mi ukiakkut ataatsimiinnermi immikkoortup suliarineqarnerani aamma eqqumiitsuliornermut aningaasaateqarfiup ataqqinninersiutinik tunniussisinnaaneranut periarfissaq oqallisigineqarmat.

Ukioq 2019-mi Naalakkersuisut akissuteqaamminni allapput ataqqinaatissiisummik tunniuttakkanut erseqqissumik inatsisitigut tunngavissiinissaq qulakkeerneqassasoq, taamanikkut eqqumiitsuliorneq pillugu inatsimmi taamaattoqarnani, taamaattumillu immikkut inatsisitigut suliniuteqartussaalluni, inatsisissatut siunnersuutitut nalinginnaasumik suleriaatsimik aqqusaarisussaq, tassunga ilanngullugu tusarniaaneq. Taamaalilluni ukioq 2019-mi ukiakkut ataatsimiinnerup nalaani ataqqinaatissiisummik tunniunneqartartunut tunngavissiisumik imaqartumik allannguutissamik siunnersuummik saqqummiussisoqarsinnaasimanngilaq. Naalakkersuisut ukioq 2019-mi akissuteqaamminni aamma allapput ataqqinaatissiisummik tunniuttakkat aningaasalersornissaat aamma qulakkeerneqarsimanngitsoq, taamaattumik taamatut

tunniuttakkat aallaaviatigut nammineq sinaakkusiussat iluanni aningaasalersorneqartussaallutik, tassa imaappoq ukiumi aalajangersimasumi aningaasanut inatsimmi aningaasat immikkoortinneqareersimasut iluanni.

Ukioq 2019-mi ukiakkut ataatsimiinnermi immikkoortup 156-ip suliarineqarnera ataqqinaatissiisummik tunniuttakkanik tunniussinissamut tunngavissalimmik siunnersuummik maannakkut saqqummiussinermut tunuliaqutaavoq. Siunnersuummi nassiunneqarsimasumi isummertoqarpoq aningaasat nammineq sinaakkusiussat iluanni aningaasalersorneqassanngitsut. Aningaasaqarnikkut kingunissat pillugit immikkoortumi oqaaseqaatini nassiunneqartuni siunnersuut pillugu aningaasaqarnikkut kingunissat nassuiarneqarput, tassa ukiumut 1 million koruunit missaanniissallutik. Siunnersuummi aamma siunertaavoq ataqqinaatissiisummik tunniussisarnernut aningaasat immikkoortut pissarsiarineqassasut, tassa siunnersuut inatsit tunngavigalugu aningaasaliinertut suliarineqarmat.

Ataqqinaatissiisummik tunniunneqartartunut aningaasaqarnikkut sinaakkusiussat siunnersuummi nassuiarneqarput. Siunnersuummut sinaakkusiussat inatsisissatut siunnersuummi suli allami aalajangersarneqartussaasut siunnersuummi allassimanera Sulisitsisut tusarniaanermi akissutaani allassimasut taamaalillutik paatsoornermik tunngaveqarsimassapput. Ataqqinaatissiisummik tunniunneqartartunut atortussatigut sinaakkusiussat aamma aalajangersarneqarput, tassa siunnersuut kina ataqqinaatissiisummik tunniuttakkanik pissarsisinnaaneranut, tunniussinissamut tunngaviliimmat, tunniunneqartartut amerlassusaat tunniunneqartartullu sivisussusaat killilerneqarmata. Tamatuma nanginnerani siunnersuut piunasaqaatinik aalajangersaanikkut aamma eqqumiitsuliorneq pillugu inatsimmi eqqumiitsuliorfiusutut eqqaaneqartut akornanni agguaassisarnikkut ataqqinaatissiisummik tunniuttakkanik erseqqinnerusumik malittarisassaliornissamut Naalakkersuisut pisussaaffeqarput.

Siunnersuut aamma tamatuma saniatigut eqqumiitsuliortunut akissarsisitsinikkut Aningaasanut inatsimmi aalajangersarneqartut aningaasat sinaakkusiussat iluanni Naalakkersuisut tapiissuteqarsinnaasut. Taamaalilluni siunertaavoq tamanna tunngavigalugu ukiut tamaasa eqqumiitsuliortumut ataatsimut arlalinnulluunniit eqqumiitsuliortunut ataatsimik arlalinnilluunniit Naalakkersuisut nersornaasiisinnaapput.